

# SIMU NA MINEȘȚA MARITATA

Scritta per il gruppo di canti popolari "I cantori di Dafni" di Cefalù  
Finale- Dicembre 1998

Sti quattru paroli scritti chi me manu  
su, ppi tutti nui, na maravighia,  
ma mi portinu a parlari d'un fattu șțranu  
sperannu ca u cori miu nu n si-ttacchighia.

Nun si po-ssapiri mai chi c'è dumani  
e mancu si la nivi n testa mi quagghia  
Sacciu però lu nnuomu ru me cani  
e-ssi pi curpa mia socch'è s'appighia.

Si nasci nfigghiu affumicatu  
ca mascarà tutta la famigghia,  
nun è comu n tizzuni già usatu,  
e nu n va ittatu mmienzu â-canighia.

Si tu nun sai chi ffù, chi succiriu,  
o cuòmu ci spuntau u mali ê-rrini.  
Si nuđđu u voli riri, u ricu iu:  
è picchì l'amuri n' avi cunfini.

L'amuri è comu u vientu e lu sulì  
chi çiuscia suprâ-terra e la quarìa  
senza ascutari si la genti voli  
e senza vardari chi-cculuri avìa.

Simu na mineșța maritata  
siculi , turchi, greci e "vo cumprà"  
e-ssi-nnasci na criatura acculurata  
è, figghia noșța e di l'umanità.

*Lucio Vranca*